

# Մասիս լեռան մասին արաբական գրոյցը

Ա. ՏԷՐ ՂԵՒՈՆԻԵԱՆ

Հայկական լեռնաշխարհի խորհրդաւոր բարձունքը՝ Մասիս լեռը դարերի ընթացքում նիւթ է դարձել բազում գրոյցների, որոնց շարքում իր ուրոյն տեղն ունի արաբ մատենագրութեան էջերում դեռ Ժ. դարից պատմուող այն հետաքրքրական աւանդութիւնը, ուր Մասիս լեռան հետ միացւում է Արաքսի մասին գրոյցը:

Մասիսը քաջ յայտնի էր արաբներին, որոնք Մեծ Մասիսը կոչում էին Հարիս, իսկ Փոքրը՝ Հուայրաս (Հարիսիկ): Ըստ Ժ. դարի աշխարհագրագէտ Իսթախրիի «Դարիլի (Դուխնի) մօտ կայ մի մեծ լեռ, որը կոչւում է ալ-Հարիս. սրա գագաթը բարձրանալ հնարաւոր չէ, բարձրութեան եւ ճանապարհի դժուարութեան պատճառով, իսկ ձիւնը նրա վրայ միշտ կայ: Նրանից ցածր կայ մի փոքր լեռ, որը կոչւում է ալ-Հուայրաս: Հարիսից են բխում (այդ երկրի) բազում ջրեր եւ նրա վրայ են փայտ կտրելու (ամտառնեքը) եւ որսատեղերը: Ասւում է, որ այս կողմերում նրանից աւելի բարձր լեռ չկայ» (1):

Նոյն դարի աշխարհագրագէտ Իպն Հաուկալը արդէն մի հետաքրքրական գրոյց է հաղորդում Մասիս լեռան եւ Արաքս դետի մասին: «Մա ալ-Իասն է եւ բարձրեալն Ալլահը յիշել է (Ղուրաֆառ) նրա ժողովրդի եւ նրա նկատմամբ իր արածը: Եթէ մէկը կարողանայ ուշադիր նայել անցնելով նրա երկու կողմերով՝ Վարսան (Վարդանակերտ) քաղաքից դէպի վերեւ եւ դէպի վայր, ապա կը տեսնի քաղաքների աւերակներ, որոնք քանդուել են, փլուել, մի քանիսը խորտակուել եւ գլխիվայր շուռ են եկել, հաստատելով

1) Bibliotheca Geographorum Arabicorum, I, 191.

բարձրեալն Ալլահի խօսքերը՝ Ադն ու Սամուզը եւ ալ-Ռասի բնակիչները, բազում սերունդներ կան նրանց եւ մեր միջեւ: Բոլորին օրինակներ տուեցինք եւ բոլորին կործանման ենթարկեցինք» (2):

Ժ. դարի աշխարհագրագէտ Մուկատտասին նոյն բանը կրկնելով աւելացնում է, որ Հարիսը եւ Հուայրասը Թաիֆից (Արաբիայից) են բերուած.

«Հարիսը մասմետական երկրներում բարձր լեռ է եւ որի գագաթը ոչ ոք կարող է բարձրանալ: Ասում են, որ նա Հուայրասի հետ միասին Թաիֆի լեռներից էր, իսկ ալ-Ռաս գետի վրայ եղել է հազար քաղաք, որոնք այժմ նրանց երկուսի տակ են գտնւում» (3): Այս դրոյցը քաջ ծանօթ է նաեւ նոյն դարի մատենագիր Մասուտիին, որը, ի միջի այլոց, յիշում է այն:

ԺԳ. դարի նշանաւոր աշխարհագրագէտ Եադուտը ի մի բերելով եղած դրոյցները, իր աշխարհագրական բառարանի մէջ Մեծ եւ Փոքր Մասիսների մասին գրում է.

«Հայաստանի մէջ երկու լեռներ են, որոնց վրայ են գտնւում Հայաստանի թագաւորների շիրիմները իրենց դանձերով: Ասում են, թէ Բլինիաս իմաստունը կախարդել է այդ լեռները, որպէսզի մարդիկ չկարողանան վերել բարձրանալ: Մատաինին ասում է, որ Հարիսը եւ Հուայրասը, որոնք Դաբիլի (Դուինի) մօտ են գտնւում, իրենց անունն ստացել են Հուայրաս Իպն Օդպայից եւ Հարիս Իպն Ամրուից, որոնք Սալման Իպն Ռապիայի հետ Հայաստան են եկել եւ նրանք առաջինն են, որ մուտք գործեցին այդ լեռները, որոնք կոչուեցին նրանց անուններով:

«Իպն ալ-Ֆաքիհը պատմում է, թէ Հայաստանում Արաքսի եզերքին հազար քաղաք կար եւ Ալլահը նրանց ուղարկեց մի մարգարէ Մուսէս կոչուած (բայց ոչ Ամրանի որդի Մուսէսին), որպէսզի նրանց իր հաւատքին հրաւիրի: Բայց նրանք մերժեցին ու քարկոծեցին նրան եւ նրա հրամանն անսաստեցին: Նա էլ անիծեց նրանց եւ Ալլահը նրանց վրայ շրջեց Հարիսն ու Հուայրասը եւ ասում են, թէ այդ բնակիչները թաղուած են նրանց տակ» (4):

Սրա շարունակութիւնն է Եադուտի մի ուրիշ հատուածը Արաքսի մասին. «Պատմում են, թէ ալ-Ռասի շուրջը հազար քաղաք

2) Opus Geographicum auctore Ibn Hauqal. Lugd. Bat., 1938, II, 345.

3) Bibl. Geogr. Arab., III, 380.

4) Jacut's Geographisches Wörterbuck, Leipzig, 1924, II, 183. Ը. Նալբանդեան, Արաքսկամ ազիւրանքը Հայաստանի եւ հայերի մասին, Երեւան, 1965, էջ 51:

դոյութիւն ունէր: Ալլահը նրանց ուղարկեց Մովսէս անունով մի մարդարէ, որը տարբեր է Ամրանի որդի Մովսէսից: Սա հրաւիրեց նրանց Ալլահի հաւատքին, բայց նրանք չհաւատացին նրան, ուրացան եւ դէմ դնացին նրա հրամաններին: Այդ ժամանակ մարդարէն անիծեց նրանց եւ Ալլահը Հարիսն ու Հուայրասը փոխադրեց Թաիֆից դէպի Առան եւ նրանց տակ թաղուեցին ալ-Ռասի բնակիչները»: Ապա Եագուտը աւելացնում է.

«Ալ-Ռասը ոռոգում է Պալասաջանի դաշտային շրջանը, որը երկարում է դետի ամբարի վրայ, սկսելով Պարզանդից դէպի Պարզա երկարող գծից մինչեւ ծովը եւ ընդգրկում է Վարսանը (Վարդանակերտ) եւ Պալականը: Այդ դաշտային շրջանում հինգ հազար դիւղեր կային եւ այժմ մեծ մասամբ աւերակ են, միայն պատերն ու շէնքերը մնում են տակաւին եւ չեն այլայլուած հողի ընտիր որակի շնորհիւ: Ասում են, թէ ալ-Ռասի մարդիկ սերած են Գողիաթից եւ բնաջնջուեցին Դաւթի ու Սողոմոնի ձեռքով, երբ դադարեցին հարկ վճարելուց: Գողիաթն էլ սպաննուել է Ուրմիսում» (5):

Մասիս լեռան ու Արաքսի մասին այս արարական գրոյցը երկու աղբիւր ունի՝ հայկական եւ արաբական, որոնց միաձուլումից է առաջացել:

Մասիսը հնագոյն ժամանակներից զրոյցների նիւթ է դարձել Հայաստանում: Մովսէս Խորենացու մօտ յիշուում է, որ Հայոց Տիգրան արքան Մարաց թագաւոր Աթոհահակին յաղթելուց յետոյ, նրա առաջին կնոջ Անոյին դերիներ ՚հետ միասին բնակեցնում է Մասիս լեռան մերձակայքում. «Բայց վերը յիշուած Անոյ կնոջ իր որդիներով հանդիստ բնակեցնում է Մեծ լեռան փլուածքի վերջում: (Այս փլուածքն, ասում են, առաջ է եկել մի ահագին երկրաշարժից. այս բանը պատմում են այն մարդիկ, որոնք Պտղոմէոսի հրամանով ընդարձակ ուղեւորութիւններ կատարելով, ասպարէզներով չափեցին մարդկանց բնակութեան տեղերը, մասամբ նաեւ ծովը եւ անբնակ վայրերը Այրեցեալ դօտուց մինչեւ Քիմիւռոն): Իսկ Անոյին սպասաւորներ տալիս է նոյն այն մարդկանցից, որ լեռան ստորոտում բնակուեցին» (6):

(Բայց զնախասացեալ կիին Անոյ բնակեցուցանէ որդւովք

5) Jacot, II, 778. Նալբանդեան, Արաբական աղբիւրները, էջ 69:

6) Մովսէս Խորենացի, Հայոց Պատմութիւն, քարգմ. Ստ. Մալխասեանի, Երևան, 1940, Գիրք Ա., գլուխ Լ.:

իւրովք յանդորրութեան սպառուածի փրածին Մեծի լերինն: (Զորմէ լեալ ասն յահազին իմն շարժմանէ, զոր պատմեն՝ որք բազմաշրջութեամբ հրամանաւ Պտղոմեայ ասպարիսօք զքնակութիւնս մարդկան չափեցին, այլ եւ մասն ինչ դժով եւ զանքնակս յայրեցածէն մինչեւ ցՔիմիւռոն): Իսկ Պաշտօնեայս տայ Անուշայ ի նոյն Մարաց որ առ ոտամբ լերինն քնակեցան) (7):

Ապա Խորենացին աւելացնում է, որ իր պատմածը վերաբերում է այն վիշապներին, որոնք ապրում են Ազատն ի վեր Մասիսի վրայ:

Մովսէս Խորենացու մօտ յիշուած է այն ահազին երկրաշարժից առաջացած փրուածքը Մեծ լերան (Մասիսի) լանջին, որը արարական զրոյցի մէջ վերածուել է հազար աւերակ քաղաքների, որոնց Մեծ եւ Փոքր Մասիսները ծածկել են: Մասիսը եւ նրա շրջակայքը միշտ էլ ենթակայ են եղել ուժեղ երկրաշարժերի եւ հրաբխային ժայթքումների, որոնցից վերջինը տեղի է ունեցել 1840 թուին, կուլ տալով Ակոռի դիւղը եւ Ս. Յակոբի վանքը: Բնականաբար այսպիսի ահազին երկրաշարժեր եղել են նաեւ հնագոյն ժամանակներում, որոնց հետեւանքով շատ քնակավայրեր կուլ են դնացել: Խորհրդաւոր լեռը իր քաջերի միջոցով խլում էր մարդկանց եւ տանում ոչնչացնում: Հայոց արքայ Արտաշէսը անիծելով իր Արտաւազդ որդուն, ասում է.

«Եթէ դու յորս հեծցիս յԱզատն ի վեր ի Մասիս, զքեզ կալցին քաջք, տարցին յԱզատն ի վեր ի Մասիս, անդ կայցես եւ զլոյս մի տեսցես» (8):

Խորենացու մօտ յիշուած յոյն նշանաւոր աշխարհագրագէտ Պտղոմէոս Կլաւտիոսի փոխարէն Եազուտը տալիս է Բլինիաս իմաստունի անունը: Վերջինս յունարէն Արտլոնիոս անուան աղաւաղումն է, որի էութիւնը դեռ ճշդուած չէ (9): Այս անուամբ մահմետական մատենադրութեան մէջ յայտնի է երկու անձնաւորութիւն՝ Արտլոնիոս Պերզացին (200 Ն. Ք.) եւ մի իմաստուն, որի անձնաւորութիւնը յայտնի է դարձել Արտլոնիոս Կապադովկիացու (Ա. դար Ն. Ք.) մասին գոյութիւն ունեցող յունական աւանդութեան շնորհիւ: Արար մատենագիրները այս աւանդական անձնաւորու-

7) Մովսիսի Խորենացու Պատմութիւն Հայոց, Էջմիածին - Տփլիս, 1918, Գիրք Ա., գլուխ Լ. (ԼԱ.):

8) Խորենացի, Գիրք Բ., գլուխ ԿԱ.:

9) M. Plessner, Balinus, Encyclopédie de l'Islam, t. I, Leyde - Paris, 1960, p. 1024.

թիւներին կոչում են իմաստուն (Հաքիմ) եւ թալիսմանների տէր : Ըստ Եազուտի այս Բլինխաւը Պարսից Կաւաս արքայի հրամանով կախարհել էր նաեւ Վանայ լիճը, այնպէս որ մինչեւ այսօր տարւայ մէջ տասը ամիս այնտեղ ձուկ չի լինում (10) :

Մասիսը կամ Արարատը հին աշխարհում ծանօթ լեռ էր եւ մանաւանդ Աստուածաշնչում, ուր յիշուում է, որ Ասորեստանի Սենեքերիմ թագաւորի որդիները՝ Աշրամելէք եւ Սարասար «գնացին փախստական ի Հայս յերկիրն Արարատայ» (11) :

Հայաստանում Մասիսը յայտնի էր որպէս վեհանիստ եւ ահազու լեռ : Վաղարշապատում եկեղեցիների շինարարութեան ժամանակ իր «խոզացեալ» վիճակից Գրիգոր Լուսաւորչի ձեռքով նոր բուժուած Տրդատ արքան անձամբ հսկայական քարեր բերեց Մասիս լեռան վրայից. «Եկաւ թագաւորը հրաժեշտ խնդրեց Սուրբ Գրիգորից հօթնօրեայ ճանապարհ գնալու բարձր լեռ Մասիսն ի վեր : Այնտեղ լեռան գլխից առնելով կարծր, անտաշ, անկոփ, խոշոր, ծանր, երկայն, հաստ եւ մեծամեծ քարեր, որոնցից մէկը ոչ ոք չէր կարող շարժել, թէկուզ եւ մարդկանց բազմութեան հետ : Արդ, հսկայազօր թագաւորը հայկաբար վերցնելով ութ քար, դրեց իր թիկունքի վրայ եւ բերեց տաճարների վկայարանները :» (Եւ եկն թագաւորն խնդրեաց հրաժեշտ ի Սրբոյն Գրիգորէ հօթնօրեայ ճանապարհ կալեալ ի վեր ի բարձր լեռուն ի Մասիս : Եւ անտի ի գըլխոյ լեռնէն առեալ վէմս արաստոյս, անտաշս, անկոփս, յաղթս, ծանունս, երկայնս, ստուարս եւ մեծամեծս, որ զմի մի ոչ ումեք լինէր հնար, թէ եւ դիպելոյ բազմութեան ի մարդկանէ՝ զայն շարժել, արդ՝ առեալ սկայազօրն հայկաբար զութ արձանսն՝ ի վերայ իւրոյ թիկանցն զայն դնէր եւ ըստանձնեալ բերէր ի վկայարանս տաճարացն) (12) :

Մասիս լեռան մասին հայկական զրոյցը անցնելով արաբական միջովայրը, լրացուել է նոր նիւթերով : Ելնելով Արաքսի արաբական *الرس* ալ-Ռաս (արտասանւում է առաս) ձեւից, արաբները այն կապել են Ղուրանի որոշ նիւթերի հետ, որտեղ նոյն անունն է յիշուում : Սօսելով Ալլահի ուղարկած մարգարէներին ամբարիշտ մարդկանց կողմից չընդունուելու մասին, Ղուրանում ասւում է.

10) Jacut, I, 513.

11) Եւ. Լէ, 38:

12) Ագաթանգեղայ Պատմութիւն Հայոց, էջմիածին-Տիֆլիս, 1909, պարբերութիւն 787:

«Նոյի ժողովուրդը, ալ-Ռասի մարդիկ ( اصحاب الرس ) Սամուր ( دؤد ) Ատը ( اءع ) փարաւոնը եւ Ղովտի եղբայրները, բոլորը սուտ հանեցին մարդարէներին» (13) :

Ապա ասում է նաեւ. «Իսկ Նոյի մարդկանց, երբ առաքեալներին սուտ հանեցին, խեղդեցինք եւ այս բանը օրինակ դարձրինք մարդկանց համար եւ մեծ տանջանք տուեցինք անիրաւաներին. Ատն ու Սամուրը եւ ալ-Ռասի մարդիկ, բազում սերունդներ կան նրանց եւ մեր միջեւ, բոլորին օրինակներ տուեցինք եւ բոլորին կործանման ենթարկեցինք» (14) :

Ատը եւ Սամուրը (ինչպէս նաեւ ալ-Ռասի մարդիկ) Արաբական թերակղզու Հնադոյն ցեղերից են (15), որոնցից Սամուրը յայտնի էր ոչ միայն Հին յոյներին, այլեւ ատորեստանեան արձանագրութիւններում է յիշուում : Ըստ մահմետական աւանդութեան Ալլահը ժամանակին առաքեալներ է ուղարկել այս ցեղերին (16), սակայն նրանք չեն հաւատացել նրանց եւ թշնամացել են եւ Ալլահը զայրացած ոչնչացրել է նրանց : Իսկ Ղովտը Ղուրանում մեծարւած առաքեալ է եւ Մուհամմէտ մարդարէն նրա ու Սողոմի ժողովրդի միջեւ եղած հակասութեան մէջ տեսնում էր իր եւ Մեքքայի հակառակորդների միջեւ եղած թշնամութեան զուգահեռը : Նոյը նոյնպէս Ղուրանում համարուած է մեծ առաքեալ, որի սիրոյն Ալլահը թերահաւատներին մեծ պատիժ էր հասցրել :

Ղուրանի յիշած այս ամբարիշտ ցեղերի կրած պատիժը, ի հարկէ, որպէս զուգահեռ, յիշեցնում է Մասիս լեւան պատժիչ հանգամանքը (ամբարիշտ Արտաւազդին պատժեցին Մասիսի քաջքերը), սակայն արաբները, ելնելով Արաքսի արաբական ալ-Ռաս ձեւի եւ Ղուրանում յիշուած նոյնանուն ցեղի ձեւական նմանութիւնից, եզրակացնում են, որ Ղուրանի խօսքերը Հենց Արաքսի մասին են, իսկ այնտեղ յիշուած ցեղը Հայաստանում է ապրել Արաքսի ափին եւ իր պատիժը կրել է Մասիս լեւան միջոցով :

Այստեղ պէտք է աւելացնել, որ պատժիչ տարերային ուժ էր համարուում ոչ միայն Մասիսը իր երկրաշարժերով ու հրաբուխներով, այլեւ Հենց ինքը յորդառատ Արաքսը իր ողողումներով եւ հունի յաճախակի փոփոխմամբ : Յիշենք այդ մասին հոռոմէացի մեծ

13) Ղուրան, 50, 12:

14) Նայմը, 25, 40:

15) Shorter Encyclopaedia of Islam, Leiden, 1953, p. 23.

16) Ph. Hitti, History of the Arabs, London, 1958, p. 30.

բանաստեղծ Վիրգիլիոսի նշանաւոր խօսքերը Արաքսի մասին, որպէս կամուրջ չհանդուրժող գետ (17) .

«Եւ Երասխայն ի կամրջաց ըմբոստ հունք» (18) :

Եադուտի այն տեղեկութիւնը, թէ Մասիս լեռան կատարին Հայոց Թագաւորների գերեզմանները կային իրենց գանձերով, ըստ երեւոյթին, իւրատեսակ ակնարկ է Նոյեան տապանի մասին, թէեւ Մասիսի տապանակիր լինելու հանգամանքը Բազրատունեաց ժամանակաշրջանից առաջ հայ պատմիչները չեն յիշում, իսկ Փաւստոս Բիւզանդի մօտ յիշուած Սարարատը (Արարատը) (19) Հարաւային Հայաստանի Կորդուք գաւառի լեռներից է, որն արաբների մօտ Ջուտի է կոչուում :

Ուշ շրջանում Մասիս լեռան հետ է կապուում նաեւ Մծբնայ Ս. Յակոբի պատմութիւնը, ըստ որի, նա բարձրանում էր լեռն ի վեր տապանը տեսնելու, բայց յոգնելով քնում է եւ հրեշտակը երազում նրան յայտնում է, որ տապանից մի կտոր արդէն նրա մօտ է : Ս. Յակոբ Մծբնացին վերցնում է այդ կտորը եւ իջնում ժողովրդի մօտ : Ահա այս դրոյցի արձագանգը երկար դարեր յետոյ պատմուելով հասել է մինչեւ մեր օրերը : Մեր դարի սկզբին Հ. Աճառեանը Մասիս լեռան վրայ քրդերից լսել է մի աւանդութիւն հետեւեալ բովանդակութեամբ . Եստ տարիներ առաջ Մասիսի այս կողմերը, ուր Ս. Յակոբի վանքն է եղել, կոչուել է Լութ, իսկ գիւղը՝ Ախուրի : Այստեղ ապրելիս են եղել չար եւ ամբարիշտ մարդիկ, որոնցից փախչելով Յաղուք մարզարէն բարձրացել է Մասիսն ի վեր տապանը գտնելու : Տեսնելով վերելքի ժամանակ նրա կրած չարչարանքները, հրեշտակը մի կտոր բերեց տուեց նրան : Այդ ժամանակ Աստուած բարկանալով Լութի բնակիչների վրայ, հրաբուխի միջոցով Ախուրին մոխիրի վերածեց (20) :

Ի հարկէ այստեղ ակնյայտ է 1840 թուականի երկրաշարժի ու հրաբխի ժամանակ Ակոուի գիւղի կործանման արձագանգը : Այսուհանդերձ, հնից եկող խաւը պարզ կերպով երեւում է յիշեալ

17) Հ. Ս. Եփրիկեան, Բնաշխարհիկ բառարան, Վեմետիկ, 1907, էջ 659 :

18) Պ. Վիրգիլիայ Մ. Եմէական, Քարգմ. Հ. Ե. Վ. Հիւրմիւրգեան, Վեմետիկ, 1845, Գիրք Ը., 1090 :

19) Փաւստոսի Բիւզանդացւոյ Պատմութիւն Հայոց, Վեմետիկ, 1933, դպր. Գ., գլուխ Ժ. :

20) Հ. Աճառեան, Մծբնայ Ս. Յակոբը Մասիսի քրդերի մէջ, Բաճաւէր, Փարիզ, 1908, էջ 61-62 :

զրոյցի մէջ: Յաղուբ (Յակոբ) մարգարէն հալածուած է եւ Մասիս լեռան միջոցով վրէժ է լուծուած Լուծի (Ղովաի) ժողովրդից, այսինքն Սողոմ-Գոմորից:

Ինչպէս տեսանք, այս զրոյցի մէջ պարզ կերպով երկու խաւ է երեւում՝ հայկական եւ արաբական: Արաբը փոխ առնելով հայկական զրոյցը (հաւանաբար բանաւոր ճանապարհով), նրա վրայ աւելացնում է նոր նիւթեր եւ այսպիսով ստացւում է մի հայ-արաբական խառն զրոյց, որի հիմքը հայկական է, բայց ժամանակի ընթացքում արաբական գունաւորում է ստացել:

Արաբ մատենագրութեան էջերում մենք գտնում ենք նման զրոյցների մի ամբողջ շարք (հայերի ծագման (21), Արայի եւ Շամիրամի (22), Կարնոյ քաղաքի (23) եւ Մասնայ ծռերի մասին), որոնց մէջ նոյն ձեւով հայկական նիւթի վրայ աւելացել է արաբականը, տալով նոր՝ հայ-արաբական խառն զրոյցներ: Այս բոլոր զրոյցները հայ-արաբական մատենագրական հարուստ առնչութիւնների շատ հետաքրքրական նմոյշներից են:

## THE ARAB FOLKTALE ON MOUNT MASSIS

A. DER-GHEVONTIAN

Mount Massis of the Armenian plateau for centuries has been subject of many folktales. The author of this study represents one of these, mentioned by Arab authors, which has been derived from the incorporation of Armenian and Arab folktales, and which has been related with the folktale of river Araxes. The folktale of Massis — in Arabic Al-Hariss — is found in the geographical and historiographical works of Istakhri (10th c.), Ibn-Hauqal (10th c.), Muqqadassi (10th c.), and Jaqut (13th c.).

21) Ա. Տէր Ղեւոնդեան, Հայերի ծագման գրոյցի արաբական տարբերակը, Բանբեր Երեւանի Համալսարանի, 1971, քիւ 1:

22) Նոյմի, Արա եւ Շամիրամ առասպելի արձագանգը արաբ պատմիչ Մասուտու մօտ, Պատմա-քանոնաբանական Հանդէս, 1965, քիւ 4:

23) Ա. Տէր Ղեւոնդեան, Կարին-Թէոդուպոլիսը առանդուքեան եւ պատմաբան մէջ, Լրաբեր Հասարակական Գիտութիւնների, 1971, քիւ 3: